

Ե Ր Կ Ո Ւ Խ Ո Ս Ք

Գամիրք գավառի հայերի մասին մինչև այժմ մի ամբողջական պատմա-աղագրական ուսումնասիրություն դեռևս չէ դրված, եթե նկատի չունենանք Գամիրքի առանձին վայրերի մասին գրված մի քանի աշխատությունները: Այդ երկասիրությունների մեջ առաջին տեղը գրավում է Արշակ Ալպոյաճյանի «Պատմություն հայ Կեսարիո» աշխատությունը: Ուշագրության արժանի են նաև Աղեքսանդր վարդապետ Անդրեասյանի «Ականավոր քաղաքին Սերաստիո պատմությունը», Ա. Քեչյանի «Ակն և ակնցիք» աշխատությունը, ինչպես նաև գերմանացի գիտնական Յիմմերերի «Կապագովկիա»-ն¹:

Ա. Ալպոյաճյանի «Պատմություն հայ Կեսարիո» երկհատոր աշխատության մեջ ի մի են բերված Կեսարիա քաղաքի և նրա շրջակայքի հայության վերաբերյալ պատմական, տեղագրական և աղագրական բազմապիսի նյութեր, որոնք անշուշտ շատ արժեքավոր են ապագա ուսումնասիրողների համար: Աղեքսանդր Անդրեասյանի «Ականավոր քաղաքին Սերաստիո պատմությունը» պատմա-աշխարհագրական մի երկասիրություն է, նվիրված Սերաստիայի վանքերի, եկեղեցիների նկարագրությանը, ինչպես և Սերաստիայի շրջանում տեղի ունեցած քաղաքական անցքերին, իսկ «Ակն և ակնցիք» արժեքավոր ժողովածուն նվիրված է Ակնի բանահյուսությանը, բարբառին և կենցաղային սովորություններին: Ինչ վերաբերում է Յիմմերերի «Կապագովկիա» աշխատությանը, որ Լ. Տուլյանը որոշ մեկնաբանական փոփոխություններով թարգմանել է «Գամիրք» անվան տակ, նույնպես մի պատմա-աշխարհագրական երկասիրություն է, որտեղ գլխավորապես խոսվում է բուն Գամիրքի հակառակ ուղղությամբ՝ Կեսարիայից Իկոնիա (այժմ Գոնյա) ընկած այսպես ասած «Քարայրների երկրի» մասին:

Գամիրքի առանձին վայրերի մասին նշված աշխատություններից «Պատմություն հայ Կեսարիո» և «Ակն և ակնցիք»-ի մեջ. թեև կան տեղեկություններ տվյալ շրջանների սոցիալ-տնտեսական կյանքի, կուլտուր-կենցաղային սովորությունների մասին, սակայն նրանցից յուրաքանչյուրում տրվում է միայն կոնկրետ շրջանի նկարագրությունը և, նույնիսկ փոքր-ինչ համեմատություն չի անցկացվում Գամիրքի մյուս շրջանների հետ:

Այսպիսով, ձեռնամուխ լինելով «Գամիրքի հայերը (պատմա-աղագագրական ուսումնասիրություն)» աշխատությանը, մեր գլխավոր նպատակն է հղել քննության առարկա դարձնել՝ ա) Գամիրքի ժաման և տեղագրման հարցը, բ) Գամիրքը Պարսկաստանի և հռոմեական տիրապետության ժամանակ, գ) միջնադարում Գամիրքի հայ աղգաբնակչության համալրումը Հա-

¹ Ա. Ալպոյաճյան, Պատմություն հայ Կեսարիո, Գահիրե, 1937, Աղեքսանդր վարդապետ Անդրեասյան, Ականավոր քաղաքին Սերաստիո պատմությունը, Վենետիկ, 1911, Յիմմերեր, Գամիրք, «Հանդես Ամսորեայ», Վիեննա, 1900, Ա. Քեչյան, Ակն և ակնցիք, Փարիզ, 1952:

յաստանի ներքին գավառներից գաղթած հայերով, դ) կենցաղն ու կուլտուրան, ե) Գամիրքի հայերի ազգակցական, ընտանեկան և հարսանեկան փոխհարաբերությունները:

Նկատի ունենալով մեր աշխատության ծավալի հնարավորությունները և հաշվի առնելով Գամիրքի գյուղական տնտեսության հայկական մյուս գավառների հետ ունեցած ընդհանրությունը, անհրաժեշտ չհամարվեց առանձին զուլի հատկացնել երկրագործությանը, անասնապահությանը և այգեգործությանը*: Սակայն, պատմա-աշխարհագրական, տեղագրական և այլ համապատասխան բաժիններում խոսվում է նաև յուրաքանչյուր շրջանի տնտեսական զբաղմունքների, արտադրությունների առանձնահատկությունների մասին: Ինչ վերաբերում է բանահյուսությանը և հոգևոր կուլտուրային, ապա դրանք, հնարավորության չափ օգտագործված են միայն Գամիրքի հայերի կենցաղն ու կուլտուրան բացահայտելու նպատակով:

Աշխատությունը գրելիս նկատի ենք ունեցել ոչ միայն Գամիրքի առանձին վայրերի մասին լույս տեսած հայերեն աշխատությունները, այլև Կապադովկիայում հայտնաբերված խեթական, ասորեստանյան, ուրարտական արձանագրությունների վերջին արդյունքները, նյութական կուլտուրայի մնացուկները, ինչպես նաև. հիշողություններ, լրագրային հոդվածներ, ճանապարհորդական նոթեր և մինչև այժմ այդ գավառի մասին օտար լեզվով եղած համարյա ամբողջ գրականությունը: Բացի այդ, երկու տասնյակ տարիների ընթացքում հավաքված հարուստ նյութի հիման վրա աշխատել ենք ընդհանրացումների միջոցով հանգել կոնկրետ եզրակացություններին:

Ես իմ խորին շնորհակալությունն եմ հայտնում հանգուցյալ ուսուցիչ Միհրան Տոնապետյանին, Մարիամ Տոնապետյանին, Իսկանդար (Աղեքսանդր) Դեմիրճյանին, Տիգրանուհի Պահլավունուն, որոնք կարևոր տեղեկություններ հաղորդեցին իրենց ծննդավայր Կեմերեկի մասին: Ինչպես նաև դասախոս Մինաս Մինասյանին, Հակոբ Ճղըլյանին, Տաճատ Աղայեկյանին, Նշան Ժամկոչյանին, Վահան Սուբիասյանին, Սեդրակ Աժդահայրյանին, Կարապետ Քեշիշյանին, Սամվել (Սանթուր) Կյուլապյանին և հասարակական գործիչ Պատրիկ Սելյանին, Կյուրիկի, Սերաստիայի, Խորսանա դյուզի, Տիվրիկի, Արարկիրի, Ժյուճյուն գյուղի, Թալաս գյուղաքաղաքի մասին կարևոր և հետաքրքիր տեղեկություններ հաղորդելու համար:

Հ. Ն. Ղ. Ի. Ն. Ա. Կ

1950 թ. մարտի 25

բ. Նրևան

* Գամիրքահայերի հոգևոր մշակույթին, բանահյուսությանը, հուշարձաններին վերաբերող նյութերը առանձին բաժիններ են կազմում, որոնք մասամբ են միայն տեղ գտել սույն աշխատության մեջ: